

Oleh : DATO' SRI MOHD NAJIB TUN ABD RAZAK
Tempat: PWTC, KUALA LUMPUR
Tarikh: 21-09-2004
**Tajuk : PERASMIAN SERENTAK PERSIDANGAN PERWAKILAN WANITA,
PEMUDA DAN PUTERI UMNO 2004**

ALHAMDULILLAH syukur ke hadrat Allah s.w.t. yang telah mengizinkan kita berhimpun pada malam ini bersama para Perwakilan Pergerakan Wanita, Pemuda dan Puteri. Saya juga bersyukur kerana telah diizinkan Allah buat pertama kalinya saya diberi penghormatan merasmikan Persidangan Perwakilan Pergerakan Wanita, Pemuda dan Puteri.

Perjumpaan malam ini mencatatkan sejarah tersendiri kerana buat julung kalinya, kita menyaksikan pucuk pimpinan ketiga-tiga sayap Wanita, Pemuda dan Puteri telah menang tanpa bertanding.

Syabas kepada Datuk Seri Rafidah Aziz, syabas kepada Datuk Hishammuddin Hussien dan syabas kepada Noraini Ahmad. Begitu juga diucapkan syabas kepada Naib-Naib Ketua Pergerakan ketiga-tiga sayap yang turut menang tanpa bertanding.

Kita juga mengambil kesempatan mengucapkan tahniah kepada ketiga-tiga pergerakan yang telah berjaya melaksanakan tanggungjawab mengadakan mesyuarat di peringkat Bahagian dengan sempurna. Kita turut merakamkan penghargaan dan terima kasih kepada Datuk Azalina Othman Said yang telah berjaya memimpin Pergerakan Puteri sejak ia ditubuhkan dengan jayanya.

Perasaan bangga dan terima kasih juga tidak dapat kita bendung-bendung lagi untuk dizahirkan kepada ketiga-tiga sayap pergerakan yang telah bekerja dengan gigih, sabar dan berani bagi kemenangan besar Barisan Nasional pada pilihan raya yang lalu.

Wanita dengan semangat kental, penuh pengalaman, gigih, tidak jemu-jemu merayu, naik turun tangga dari rumah ke rumah meninggalkan keluarga dan anak-anak, terus bekerja tanpa mengira masa demi untuk kemenangan parti tercinta.

Peranan Pemuda pula dengan gerak gempurnya persis seorang pendekar terbilang berjuang bermati-matian dengan seluruh

kekuatan jentera di setiap peringkat.

Demikian juga Puteri dengan jari-jari halusnyanya menyentuh komputer, mengatur program membuat analisis serta turut merayu undi sehingga lawan tidak dapat berbuat apa-apa lantas terkesima dan hilang pertimbangan.

Kita juga amat berbangga, kerana belum pun sempat kering peluh dan hilang penat daripada Pilihan raya Umum Ke-11, sekali lagi Wanita, Pemuda dan Puteri bingkas menyahut panggilan parti, bertungkus-lumus dengan penuh komitmen, turun ke padang menghadapi pilihan raya DUN Kuala Berang dan Alhamdulillah, kita telah menang dengan majoriti yang bertambah. Syabas kepada semua.

Marilah kita bersama-sama, merakamkan ucapan terima kasih kepada Tun Dr. Mahathir Mohamad yang telah berjaya bukan sahaja memimpin negara dan parti selama lebih 22 tahun tetapi juga telah berjaya mengekalkan tradisi peralihan pucuk pimpinan parti dan kerajaan, dengan penuh bijaksana, penuh teratur dan penuh tertib.

Seterusnya, Alhamdulillah, tampil pula Datuk Seri Abdullah Ahmad Badawi, sebagai Perdana Menteri yang kelima, dengan perwatakan yang sederhana, diwarisi daripada sifat ayahnya seorang ulama.

Pendekatan yang dibawa bersifat mesra rakyat, dengan ethos bekerjalah bersama saya, dan bukan untuk saya, bersama iltizam politiknya untuk mengurangkan kerenah birokrasi, meningkatkan sistem penyampaian kerajaan, membudayakan ketelusan, memerangi rasuah, membasmi kemiskinan, ternyata berjaya memikat hati rakyat sehingga Barisan Nasional telah memenangi pilihan raya Umum Ke-11 dengan peratusan kerusi yang tertinggi sepanjang sejarahnya. Syabas kita ucapkan kepada Perdana Menteri kita.

Segala penat lelah selama ini juga terjawab apabila kita telah berjaya menongkah arus politik semasa dengan memenangi hati dan perasaan generasi muda. Lazimnya orang-orang muda di kebanyakan negara bersikap menentang kerajaan atau anti-establishment, tetapi dalam pilihan raya yang lalu, majoriti besar di kalangan generasi muda telah menyokong UMNO. Dengan hakikat ini ternyata UMNO mampu menampilkan imejnya sebagai parti yang masih segar, dinamik dan dapat memenuhi aspirasi golongan muda di negara ini.

Lantaran itulah UMNO sebagai sebuah parti yang perkasa dan berkuasa dapat kita pertahankan terus menerus dengan izin Allah s.w.t.

Pilihan raya umum Ke-11 juga telah mempamerkan dengan jelas bahawa UMNO masih merupakan parti pilihan utama orang Melayu. Tidak hairanlah, ungkapan UMNO itu Melayu dan Melayu itu UMNO masih terpahat sebagai kata-kata keramat. Sesungguhnya orang Melayu menolak politik sempit. Orang Melayu juga menolak fahaman melampau atau ekstrem dan orang Melayu tidak lagi mahu pemimpin yang hanya pandai beretorik sahaja.

Makanya Malaysia di bawah kepimpinan UMNO yang matang, telah membuktikan kepada dunia yang kini dibelenggu dengan ancaman keganasan dan fahaman militan bahawa kita sebenarnya dapat menundukkan golongan yang berfahaman demikian melalui peti undi dan bukannya dengan jalan kekerasan. Inilah di antara kelebihan dan keunggulan UMNO; parti kita semua, parti keramat, parti yang kita banggakan.

Pepatah lama berbunyi: Kelebihan Nabi dengan mukjizatnya, kelebihan umat dengan muafakatnya.

Oleh itu bermuafakatliah kita semua di bawah pimpinan ketua kita, Datuk Seri Abdullah Ahmad Badawi yang dikasihi.

Bagi saudara-saudari yang masih muda dan baru mengenali UMNO, hayatilah cogan kata yang telah dipilih oleh pengasas-pengasas UMNO terdahulu iaitu BERSATU, BERSETIA DAN BERKHIDMAT. Apabila kita bersatu, maka kekuatan akan bersekutu, apabila kita bersetia, bangsa jadi mulia, dan apabila kita berkhidmat nescaya direstui umat.

Sesungguhnya ganjaran yang paling besar kepada perjuangan kita ialah apabila sentiasa mendapat sokongan dan dokongan daripada rakyat. Dari rakyat kita datang, kepada rakyat kita menyumbang. Jika mandat telah diberi, itulah amanah yang perlu dihargai.

Setiap bangsa yang maju adalah bangsa yang mempunyai sejarah perjuangan yang panjang. Sejarah mereka inilah yang menjadi pengajaran dan landasan untuk bangkit dan membina tamadun seterusnya. Walaupun ada orang yang berpendapat bahawa sejarah bangsa Melayu tidak seganding dengan tamadun bangsa-bangsa lain, tetapi jika diteliti secara mendalam, bangsa Melayu sememangnya, mempunyai kekuatan dan

kelebihannya yang tersendiri, sehingga telah berjaya berada pada tahap kita hari ini.

Jika benarlah salah satu daripada teori ahli antropologi, bahawa bangsa Melayu berasal dari Himalaya dan turun dengan seluruh kekuatannya membuka dan memajukan tanah pamah di selatan hingga ke Semenanjung Tanah Melayu; seterusnya dari Sungai Melayu di Palembang dan Tasik Malaya di Jawa serta seluruh kepulauan di Pasifik hingga ke Antananarivo (Tanah Ribu) ibu negara Madagascar; maka, dapatan ini eloklah dijadikan renungan dan azimat kepada kita untuk menjejaki bagaimana Melayu telah menempatkan dirinya dalam arus ketamadunan manusia.

Soalnya: Pada ketika dunia didominasi tamadun Hindu - Buddha, di manakah Melayu? Sewaktu dunia di bawah kegemilangan tamadun Islam, di manakah Melayu? Sewaktu dunia didominasi kuasa imperialis Barat, di manakah Melayu? Pada ketika timbulnya negara-negara yang baru merdeka daripada penjajahan Barat selepas Perang Dunia Kedua, di manakah Melayu? Pada ketika dunia di bawah penguasaan kuasa unipolar kini, di manakah Melayu? Dan hari ini, semasa umat Islam sedang mencari-cari jawapan kepada segala kelemahan mereka, di manakah Melayu?

Jawapannya, dalam semua episod sejarah yang tersebut, orang Melayu lah yang memainkan peranan utama. Ini kerana orang Melayulah yang menubuhkan Kerajaan Sri Vijaya di Sungai Melayu di Palembang, orang Melayu juga yang mempelopori Kerajaan Langkasuka, Majapahit dan Gangga Negara. Orang Melayu lah yang mula-mula menyahut seruan Islam di Melaka. Orang Melayu lah juga yang menerajui kegemilangan Kerajaan Melayu Melaka, Demak, Aceh, Ligor dan Champa.

Kitalah juga yang menjadi pejuang di barisan hadapan yang menentang penjajah dan berjaya mencapai kemerdekaan. Orang Melayu lah yang bangkit dengan berani menidakkan kata-kata kuasa besar, dengan berpegang teguh kepada prinsip keadilan dan kebenaran. Alhamdulillah, itulah sebabnya kita dapat terus bertapak kukuh, mengamalkan budaya, menguasai politik dan pemerintahan, mempertahankan maruah Islam yang suci serta menjadi bangsa yang berdaulat.

Terbukti, dengan pendekatan kita yang sederhana, bijaksana, toleransi yang tinggi, sanggup berjuang bermati-matian, tabah dan berani maka kita akhirnya berjaya menerajui negara yang maju, progresif dan dinamik seperti Malaysia

yang kita cintai.

Walhal, tercatat dalam sejarah, bahawa banyak bangsa yang telah tenggelam ditelan zaman seperti Aztec dan Maya di Amerika Selatan, Gipsi di Eropah, Red Indian di Amerika, pribumi di Australia dan Kepulauan Pasifik.

Saya bawa isu ini, untuk dijadikan iktibar, bahawa, sesungguhnya bangsa Melayu memang memiliki asas jati diri yang kuat, berdaya tahan utuh, mempunyai unsur keupayaan untuk bersaing, mampu menyesuaikan diri dan menyumbang kepada survival bangsa serta kesinambungan kuasa pemerintahan. Sejarah telah membuktikan bahawa kita pernah cemerlang. Maka tidak hairanlah jika kita sedang bangkit sekali lagi untuk mewarnai dan mencipta watak-watak agung sebaris dan setanding dengan orang lain yang maju di dunia pada hari ini.

Berbagai fenomena yang berlaku telah merubah landskap politik dunia hari ini. Penjurusan dan kecenderungan kepada sistem kuasa unipolar dalam politik antarabangsa, pembentukan orde baru dunia, arus globalisasi serta konsep dunia tanpa sempadan, ternyata telah mengundang ketidakpastian.

Kita amat simpati dengan penderitaan rakyat Palestin yang masih tidak terbela sehingga hari ini. Kita juga prihatin tentang konflik yang sedang berlaku di Iraq. Konflik ini telah meragut begitu banyak nyawa rakyat yang tidak berdosa.

Dunia juga seolah-olah tidak boleh berbuat apa-apa apabila negara-negara berdaulat dicerobohi sewenang-wenangnya tanpa alasan yang kukuh atau pembuktian yang nyata. Pertubuhan Bangsa Bangsa Bersatu yang diharapkan sebagai satu badan antarabangsa untuk melindungi kepentingan ahli-ahlinya, ternyata gagal, memainkan peranan sehinggakan ketetapan-ketetapan yang dibuat olehnya tidak diendahkan malah diabaikan begitu sahaja.

Pada masa yang sama, persekitaran ekonomi global juga telah berubah dengan mendadak. Antara lain, negara China telah bangkit sebagai sebuah kuasa baru ekonomi dan gergasi dagangan yang amat menakjubkan.

Dasar pasaran terbuka yang telah dilaksanakan di China sejak awal tahun 90-an telah menyaksikan kemasukan dana dan

pelaburan asing yang begitu banyak ke negara itu, sehinggakan negara-negara lain di rantau ini amat terasa kesannya. Ramai pelabur yang sebelum ini melabur di rantau Asia Tenggara, kini mengubah haluan ke China, kerana tarikan kos pengeluaran yang jauh lebih rendah dan pasaran domestik yang besar.

Dalam pada itu, India juga telah mula muncul sebagai sebuah lagi kuasa baru ekonomi di Asia di samping China. India semakin diyakini sebagai pusat baru pertumbuhan ekonomi Asia khususnya dalam sektor teknologi maklumat dan farmaseutikal.

Selain daripada saingan kuasa-kuasa ekonomi baru ini, kita mula menerima kesan dari arus globalisasi. Perjanjian WTO, AFTA dan juga berbagai perjanjian perdagangan bebas dua hala antara negara semakin menuntut keterbukaan pasaran secara menyeluruh. Semakin hari, kita semakin hampir dengan kenyataan bahawa tiada lagi perlindungan terhadap pasaran kita dan kita perlu bersedia menghadapi saingan dari syarikat-syarikat asing di peringkat global.

Berdasarkan senario dunia ini, kita perlu mempersiapkan dan memperkuat bangsa kita supaya mampu menghadapi cabaran global dengan cemerlang. Kepentingan dunia Melayu dan Islam, kepentingan negara-negara ASEAN dan kepentingan rantau Asia Timur, tidak boleh kita abaikan dalam setiap percaturan dan perhitungan demi masa depan bangsa.

Hanya bangsa yang kuat sahaja akan disegani oleh kawan dan lawan. Apabila kita disegani barulah suara kita akan didengari oleh orang lain. Sejak kebelakangan ini, polemik agenda ekonomi Melayu telah dibangkitkan semula oleh para pemikir kita.

Mereka mengakui Dasar Ekonomi Baru telah berjaya mengubah kedudukan orang Melayu dengan amat ketara dari tahun 70-an sehingga 90-an. Walaupun begitu, mereka berpendapat kejayaan selama lebih 20 tahun itu, nampaknya kini seolah olah terhakis dan tidak lagi dipertahankan.

Biar apa pun pandangan yang diberikan, persoalan agenda ekonomi Melayu ini perlu dikupas dan dibahas dalam konteks dan kerangka yang lebih tepat. Kita perlu mempunyai perspektif seimbang dan bersifat jangka panjang.

Secara mutlakny, kita tidak boleh nafikan bahawa pencapaian ekonomi orang Melayu sejak tiga dekad yang lalu, amatlah menakjubkan. Pada tahun 70-an, Bumiputera hanya mampu memiliki modal saham syarikat berhad sebanyak RM125 juta.

Pada tahun 2002, angka ini mencecah RM73 bilion, iaitu peningkatan purata sebanyak 22% setahun atau 595 kali ganda daripada jumlah asal. Manakala pendapatan isi rumah pula, purata pendapatan kasar Bumiputera meningkat daripada RM492 sebulan pada tahun 1980 kepada RM2,376 pada tahun 2002 iaitu peningkatan purata sebanyak 7.4 peratus setahun.

Selain itu, golongan profesional juga sering dijadikan kayu ukur kepada kemajuan bangsa. Sebagai contohnya, pada tahun 1980, cuma terdapat 341 doktor Bumiputera di negara ini. Pada tahun 2002, bilangan doktor Bumiputera meningkat lebih sepuluh kali ganda kepada 5,346 orang. Kalau dahulu bilangan doktor Bumiputera cuma 10 peratus, satu jumlah yang amat kecil berbanding doktor daripada kaum-kaum lain tetapi pada hari ini peratusan doktor Bumiputera telah meningkat kepada 39 peratus dan merupakan kumpulan yang paling besar dalam bidang ini.

Begitu juga dengan pencapaian kita dalam membasmi kemiskinan yang mana impaknya terlalu besar ke atas bangsa Melayu. Dalam masa tiga dekad yang lampau, kita telah berjaya mengurangkan kadar kemiskinan daripada 50 peratus menurun kepada 5 peratus dan kerajaan berikrar untuk terus menghapuskan kemiskinan tegar dalam masa lima tahun ini.

Saya ajukan fakta-fakta ini untuk mengingatkan kita semua bahawa Melayu sudah mara jauh ke hadapan dari segi ekonomi tanpa perlu dibandingkan dengan orang lain.

Hakikatnya, kita mampu mencapai perubahan besar ini dalam tempoh satu generasi sahaja. Jikalau dahulu ayahnya seorang petani, kini anaknya menjadi profesional yang berjaya di bandar. Kalau dahulu ibunya seorang bidan kampung, anaknya kini menjadi pakar sakit puan di hospital. Kenyataannya, inilah satu kejayaan mobiliti sosial menegak (vertical social mobility) pembangunan bangsa yang amat menakjubkan. Kita patut bersyukur dan berbangga atas kejayaan kita ini yang telah mendapat pengiktirafan antarabangsa.

Di sebalik kejayaan yang telah dicapai, kita juga harus sedar bahawa agenda ekonomi orang Melayu merupakan satu

agenda perjuangan yang belum selesai.

Landasan untuk menjadi bangsa yang terbilang menuntut kita mengambil langkah-langkah yang tepat dan terancang.

Langkah pertama: Mengukuhkan kepentingan ekonomi Melayu. UMNO amat sedar akan tanggungjawab ini dan tidak akan lari dari prinsip serta pegangan untuk terus mengukuhkan kepentingan ekonomi orang Melayu.

Secara relatifnya, jika dibandingkan penguasaan modal, pendapatan isi rumah dan bilangan usahawan Bumiputera, dengan peratusan orang-orang bukan Bumiputera, kita belum lagi mencapai satu tahap peratusan yang seimbang. Di sinilah saya ingin menegaskan bahawa UMNO ingin melihat roh, semangat dan prinsip Dasar Ekonomi Baru hidup, bersemarak dan berterusan.

Jelasnya, agenda kita untuk mengukuhkan kedudukan ekonomi orang Melayu tidak pernah terhenti malah akan terus diperhebatkan. Sesungguhnya kejayaan orang Melayu dalam bidang ekonomi perlu dilihat sebagai satu faktor penting dalam menjamin kestabilan negara dan ia sebenarnya membawa keuntungan bukan sahaja kepada orang Melayu bahkan juga kepada orang-orang bukan Melayu di negara ini. Kita akan memastikan pengagihan kekayaan negara dengan adil dan saksama.

Langkah kedua: Mengamalkan nilai-nilai murni. Orang Melayu hendaklah pandai menjana semula nilai-nilai tradisional yang diadunkan dengan nilai-nilai kontemporari untuk terus memacu kejayaan.

Sememangnya sejak dahulu kala orang Melayu terkenal dengan sifat amanah, kesetiaan, kejujuran, keikhlasan, kesabaran, kesederhanaan, kesopanan dan semangat kekeluargaan yang tinggi. Nilai-nilai tersebut perlulah dimantapkan lagi dengan pemikiran global, saintifik, strategik dan budaya pencapaian tinggi (high performance culture).

Kita perlu berubah daripada sikap sambil lewa kepada sikap bersungguhsungguh, daripada sikap berlebihan kepada sikap lebih tepat (precision society), daripada kepercayaan karutmarut kepada kepercayaan saintifik dan daripada pemikiran beremosi (emotional thinking) kepada pemikiran rasional (rational thinking), daripada tumpuan taktikal kepada pemikiran strategik dan seterusnya daripada

pemikiran yang bercelaru, kepada pemikiran yang mementingkan keutamaan (priority/awlawwiyat).

Hanya dengan adunan kedua-dua nilai tersebut dapat kita pastikan bahawa orang Melayu mampu menangani cabaran persekitaran global tanpa mengorbankan jati diri yang berpaksikan Islam dan Melayu itu sendiri. Kisah kejayaan kita sebenarnya, telah pun dipelopori oleh pemimpin dan orang-orang Melayu yang terdahulu. Dalam hal ini, ada satu cerita rakyat yang boleh kita ambil iktibar:

Pada zaman binatang boleh bercakap, ada sepasang musang jantan betina. Hidup mereka sekeluarga amatlah susah dan si jantan sentiasa mengeluh. Maka suatu hari mereka berdua telah ke istana berjumpa Raja Sulaiman dan menceritakan hal kesusahan mereka. Titah Raja Sulaiman, engkau baliklah nescaya kesenangan akan mengekori kamu.

Bila sampai di rumah, ia pun cuba melihat ekornya, tetapi tidak kelihatan kesenangan, kekayaan dan emas. Dia pun menyuruh musang betina melihat kalau-kalau di ekornya ada kesenangan, kekayaan atau emas. Ternyata tiada! Oleh sebab tidak puas hati, mereka pun sekali lagi ke istana untuk berjumpa Raja Sulaiman dan mengadu di ekor mereka tiada terdapat kesenangan, kekayaan dan emas sebagaimana dijanjikan.

Jawab Raja Sulaiman, sebenarnya jika kamu berjalan ke hadapan, terus berusaha, bekerja keras nescaya kesenangan, kekayaan, kemakmuran akan mengekori kamu.

Justeru, setelah saya diberi kepercayaan oleh Perdana Menteri untuk bertanggungjawab ke atas FELDA, saya dapati ada satu pengajaran besar yang ingin saya kongsi bersama dalam majlis ini.

FELDA adalah satu contoh rancangan pembukaan tanah secara besar-besaran yang berjaya. Dalam masa hampir 50 tahun sejak penubuhannya pada tahun 1956, FELDA pada hari ini muncul sebagai ladang kelapa sawit dan getah yang terbesar di dunia. Usaha ini melibatkan tenaga seramai 103,000 orang peneroka, membuka tanah melebihi 800,000 hektar di 275 rancangan. Kini FELDA telah menyumbang sebanyak RM8.5 billion kepada pendapatan tahunan negara dan menghasilkan 12.5 peratus keperluan minyak sawit dunia. Atas kejayaan ini, FELDA merupakan projek kerajaan yang cukup dikagumi oleh dunia ketiga.

Semuanya ini dimungkinkan tercapai, hasil daripada perahan keringat dan pembantingan tulang orang Melayu. Jiwa dan semangat meneroka (pioneering spirit dan roh hijrah) Melayu yang diwarisi mereka dari nenek moyang dulu, ternyata luar biasa. Inilah buktinya, apabila orang Melayu dibimbing dengan perancangan yang jitu, dengan wawasan yang jelas, ia pasti akan membuahkan hasil yang membanggakan. Bak kata pepatah, kalau sudah benih yang baik, jatuh ke laut menjadi pulau.

Persoalannya sekarang, dengan kehidupan kita yang lebih selesa, baik di bandar-bandar mahupun di kampung-kampung, mampukah orang Melayu menghidupkan semangat juang dan memupuk kekuatan rohani dan jasmani seperti semangat meneroka FELDA ini?

Mungkinkah orang Melayu sudah mula cepat berasa puas hati dengan kejayaan dan keselesaan yang ada? Maka, cabaran pemimpin Melayu, khususnya pemimpin UMNO ialah untuk membentuk bangsa Melayu yang sentiasa mencari peluang dan berusaha untuk menjadi lebih baik daripada keadaan yang sedia ada.

Langkah ketiga: Mementingkan penguasaan ilmu dan pendidikan. Bangsa yang cemerlang adalah bangsa yang mementingkan penguasaan ilmu dan pendidikan. Seandainya sesuatu bangsa itu berada dalam kegelapan dan kejahilan ilmu pengetahuan, nescaya ia tidak dapat menilai sesuatu yang penting dan bermakna kepada mereka.

Dalam hal ini, saya ingin membawa satu kisah benar tentang penemuan Batu Bersurat yang memiliki nilai sejarah amat tinggi dan bermakna dalam menandakan kedatangan Islam serta hukum-hakamnya di rantau sebelah sini, sekali gus menjadi bukti bahawa orang-orang Melayu telah memeluk agama suci ini sejak abad ke-13. Batu Bersurat yang bertarikh 702 Hijrah ini telah ditemui pada tahun 1887 Masihi di kawasan Padang Tara di tepi Sungai Tara, Kampung Buluh Kuala Berang, Terengganu.

Sayangnya, disebabkan kejahilan orang-orang Melayu pada ketika itu, Batu Bersurat tersebut tidak dapat dinilai kepentingannya. Batu Bersurat itu telah dijadikan alas tempat membasuh kaki di masjid selama hampir 16 tahun sebelum ditemui oleh seorang pedagang dari Riau Lingga yang bernama Saiyed Hussein Ghulam Al-Baukhari pada tahun 1902.

Hanya 20 tahun selepas itu, iaitu pada tahun 1922, gambar batu bersurat itu telah dihantar kepada seorang Inggeris yang bernama C. O. Blegden untuk dikaji dan dibuat pembacaan.

Bayangkanlah, tanpa ilmu pengetahuan, kita tidak dapat menilai dan menghargai sesuatu perkara yang sangat signifikan dalam sejarah dan tamadun kita.

Malahan kita terpaksa bergantung pula kepada orang asing untuk mengkaji dan menterjemahkan bukti sejarah dan tamadun kita sendiri. Ironisnya Batu Bersurat tersebut ditulis di dalam bahasa Melayu dan tulisan jawi!

Lantaran itu, penekanan dan keutamaan kepada soal ilmu dan pendidikan akan diteruskan kerana ia merupakan kunci kepada kejayaan. Kita harus mampu mengadakan anjakan terhadap pencapaian bangsa. Daripada ilmu kapal layar kepada ilmu kapal selam; daripada ilmu layang-layang kepada ilmu angkasawan; daripada ilmu hasil tani kepada ilmu ekonomi berasaskan pengetahuan.

Menerusi pendemokrasian pendidikan, kita membuka peluang seluas - luasnya kepada semua, sama ada di bandar atau di desa untuk menerima pendidikan yang berkualiti. Bagi menjamin kualiti pendidikan bertaraf dunia, dari peringkat dasarnya lagi, kita akan memperkasakan sekolah sekolah kebangsaan sehingga ia menjadi pilihan utama semua kaum. Ini bukan sahaja meletakkan mutu pendidikan ke taraf yang lebih tinggi malah dapat mempercepatkan proses perpaduan di negara ini.

Lanjutan dari itu, kita akan terus berusaha untuk meningkatkan nisbah mereka yang berjaya memasuki institusi pengajian tinggi sama ada di peringkat diploma atau ijazah dalam bidang-bidang strategik. Dari segi kualiti pula, kerajaan akan memastikan negara kita menjadi pusat pendidikan serantau yang cemerlang, berdaya saing, bermutu tinggi dan berjaya melahirkan graduan ulung bertaraf dunia.

UMNO amat prihatin dengan kehendak semasa rakyat dalam usaha memartabatkan mutu pendidikan negara. Misalnya resolusi melalui suara Pemuda suatu masa dahulu telah mendesak institusi- institusi korporat menyumbang secara langsung dalam perkembangan pendidikan. Hasilnya, tertubuhlah Universiti Tenaga Nasional, Universiti Telekom dan Universiti Petronas.

UMNO juga menyokong kuat sebarang usaha untuk memenuhi apa-apa tuntutan pendidikan orang Melayu yang semakin hari semakin bertambah.

Kendatipun begitu, dalam kesungguhan melahirkan golongan profesional dan pengurusan, kita tidak seharusnya lupa kepada cabang-cabang pendidikan yang berbentuk teknikal dan kemahiran vokasional.

Sesungguhnya kebimbangan yang wujud di kalangan negara-negara yang sedang membangun ialah ketandusan tenaga mahir di bidang teknikal dan vokasional. Justeru, saya menyeru kepada Wanita, Pemuda dan Puteri agar bangkit dalam satu gerakan besar-besaran untuk membangunkan sumber manusia atau human capital sebagai nadi utama kepada kejayaan negara kita.

Jadilah barisan utama yang memperjuangkan agenda pendidikan dengan tumpuan ke arah melahirkan generasi muda yang lebih terdidik dengan ilmu dan kemahiran, agar UMNO mampu menjadi contoh ikutan dalam masyarakat .

Wanita, Pemuda dan Puteri seharusnya menjuarai gerakan ini di kawasan dan bahagian masing-masing, berperanan sebagai penggerak agenda pendidikan di peringkat akar umbi dengan memastikan tidak ada seorang pun anak bangsa yang tercicir daripada mendapat pendidikan asas selama 11 tahun.

Proses ini tidak akan terhenti selepas tempoh 11 tahun ataupun di peringkat SPM sahaja, malah anak-anak bangsa kita perlu terus diberi peluang menyambung pengajian mereka. Kepada yang cenderung dalam bidang akademik mereka akan ke pusat-pusat pengajian tinggi dan sebahagian yang lain ke arah pendidikan bercorak kemahiran dan teknikal seperti di Kolej Komuniti, Vokasional dan Politeknik berlandaskan konsep pendidikan sepanjang hayat.

Langkah keempat. Penguasaan bahasa asing.

Penguasaan bahasa asing amatlah penting sebagai satu lagi kekuatan kita untuk menjadi bangsa yang lebih kompetitif, bermaklumat, berteknologi dan saintifik.

Sesungguhnya cinta kepada bahasa ibunda tidak boleh dijadikan alasan untuk tidak memahirkan diri kita berkomunikasi dalam bahasa lain, selain daripada bahasa

Melayu. Tokoh-tokoh pejuang bangsa dan bahasa terdahulu, yang kuat faham kebangsaannya dan amat bersifat anti penjajah, juga tidak menafikan kepentingan menguasai bahasa asing sebagai strategi menghadapi lawan.

Contohnya, siapa tidak kenal Zainal Abidin Ahmad atau Zaba. Sebagai Pendeta Bahasa Melayu yang terulung, Zaba juga memahirkan dirinya dengan berbagai bahasa asing terutamanya bahasa Inggeris.

Dalam konteks ini, saya kira tidak salah kita memberi penghargaan kepada usaha pembikinan filem Puteri Gunung Ledang. Tersohornya filem legenda Melayu ini di persada antarabangsa, yang penuh dengan keindahan bahasa kita, dimungkinkan bukan sahaja kerana kita memiliki kekuatan kewangan, tetapi juga kerana kita mampu menggembelngkan kepakaran perfileman dan strategi pemasaran, hasil dari kemampuan kita menguasai bahasa asing.

Tidak syak lagi, kepentingan penguasaan bahasa asing ini bukanlah sekadar omongan kosong atau retorik semata-mata. Ia adalah satu realiti.

Contohnya dalam era teknologi, komunikasi dan maklumat (ICT), Malaysia sekarang menduduki tangga ketiga selepas China dan India dalam senarai negara - negara yang paling berdaya maju dan sesuai bagi aktiviti kongsi perkhidmatan(shared services), sumberan luar (outsourcing), operasi pejabat pentadbiran (back office operations) dan pusat panggilan serantau (regional call centre). Ini kerana, selain daripada faktor kos berniaga yang kompetitif dan produktiviti pekerja yang tinggi ternyata, keupayaan kita berkomunikasi dalam berbagai bahasa dengan baik menjadi satu lagi daya tarikan yang penting.

Berdasarkan kelebihan ini, kita bakal menjana kekayaan baru kepada negara dan tidak hanya sekadar menjadi penonton kepada ledakan dunia ICT yang terus berlalu di hadapan kita.

Natijahnya, kita ingin melihat lahirnya satu generasi bangsa yang berjati diri Melayu, berpaksikan akidah Islam serta berfikiran global dan menguasai berbilang bahasa.

Marilah kita renungi kata-kata hukama Islam yang berbunyi: Satu bangsa yang menguasai sesuatu bahasa dari satu bangsa yang lain sesungguhnya tidak akan tertipu oleh bangsa tersebut.

Dalam surah Ar-Rum pula, ayat 22, Allah s.w.t. berfirman yang maksudnya : Dan di antara tanda-tanda yang membuktikan kekuasaan Allah dan kebijaksanaan-Nya ialah diciptakan langit dan bumi, dan perbezaan bahasa serta warna kulit (bangsa). Sesungguhnya yang demikian itu menjadi bukti dan keterangan bagi orang-orang yang berilmu.

Ayat ini menganjurkan supaya kita umat Islam membuka luas minda ke arah konsep keantarabangsaan dengan tujuan bukan sahaja untuk berkenalan dan mengeratkan silaturrahim malah menjangkau jauh bagi melakukan urusan antara manusia melalui konsep muamalah di atas muka bumi ini.

Langkah kelima: Memilih pemimpin berasaskan merit. Sesungguhnya pemilihan pemimpin adalah perkara yang amat serius. UMNO adalah tonggak kedaulatan bangsa Melayu. Maka pemimpinnya adalah akar yang menunjangi tonggak itu. Kuat pemimpin teguhlah tonggak, gagahlah bangsa. Lemah pemimpin, goyahlah tonggak, layulah bangsa. Oleh itu pemilihan pemimpin di dalam UMNO adalah suatu perkara yang akan memberi kesan kepada masa depan parti dan bangsa.

Sama seperti pilihan raya, memilih pemimpin di dalam parti juga merupakan tanggungjawab dan amanah bagi mereka yang berhak memilih. Bagi perwakilan, tugas mereka adalah amat berat, kerana mereka dipertanggungjawabkan untuk memilih barisan kepimpinan yang bakal menentukan hala tuju dan haluan parti pada masa yang akan datang.

Pada tahun ini, tanggungjawab perwakilan nampaknya menjadi semakin berat apabila makin ramai calon yang menawarkan diri untuk bertanding. Apa yang cantiknya, semakin ramai calon yang layak bertanding, ia memberi kelebihan kepada perwakilan untuk memilih pemimpin yang terbaik antara yang bertanding.

Jika pemimpin yang terpilih adalah pemimpin yang beramanah, bijaksana, cekap, jujur, ikhlas, berwawasan dan berdisiplin, maka perjalanan parti untuk tahun-tahun akan datang pastinya lebih mudah dan lancar, malah parti akan berada pada kedudukan yang lebih kukuh. Sebaliknya jika pemimpin yang dipilih tidak berdasarkan kriteria yang saya sebutkan, sudah tentu ia akan merumitkan pengurusan dan perjalanan parti. Lebih buruk daripada itu, ia mungkin menjejaskan imej parti pada pandangan umum dan akhirnya UMNO akan menjadi lemah dan hilang pengaruhnya.

Perkara yang sedemikian bukanlah perkara baru. Banyak parti politik yang telah memperjuangkan kemerdekaan bagi negara mereka, dahulunya gagah perkasa dan tidak langsung tergugat oleh cabaran mana-mana pihak, tetapi akhirnya menjadi lemah dan hancur kerana kepimpinan yang tidak berkebolehan dan tidak berkemampuan untuk mempertahankan kedudukan parti mereka.

Alhamdulillah, UMNO kuat dan akan terus kuat. Kita bersyukur kerana UMNO dipimpin oleh barisan pemimpin yang cekap dan berwibawa, yang mampu membawa perjuangan ini terus maju ke hadapan sehingga kita mengecapi kejayaan yang dinikmati hari ini.

Saya ingin menyeru khususnya kepada Pemuda dan Puteri, sebagai golongan muda di dalam parti, pemimpin yang saudara-saudari pilih hari ini adalah pemimpin yang bakal mewarisi tampuk kepimpinan parti pada hari esok. Masa depan UMNO terletak di tangan mereka. Malah masa depan agama, bangsa dan negara juga berada di dalam genggamannya. Oleh itu, pastikanlah saudara-saudari tidak mensia-siakan amanah yang diberikan ini.

Sabda Rasulullah s.a.w. yang bermaksud; Apabila amanah telah disia-siakan, maka tunggulah kehancurannya. Sahabat bertanya, bagaimanakah yang dikatakan mensia-siakan amanah itu?. Rasulullah menjawab; Apabila sesuatu urusan diserahkan kepada orang yang bukan ahlinya, maka tunggulah saat kehancurannya. (Hadis Riwayat Bukhari)

Oleh yang demikian, kita amat mengharapakan UMNO membuat pemilihan pemimpin berdasarkan merit. Ini bererti, pilihlah pemimpin yang beretika. Pilihlah pemimpin yang terbukti kewibawaannya. Pilihlah mereka yang memiliki kemampuan untuk memimpin dengan cemerlang. Dan yang paling penting pilihlah pemimpin yang benar-benar mengerti nilai - nilai perjuangan UMNO dan bangsa.

Inilah perkara-perkara yang harus diambil kira dalam melaksanakan tugas dan tanggungjawab kita untuk memilih pemimpin parti. Janganlah kita tersilap dengan membesarkan proses pemilihan sebaliknya lupa kepada matlamat yang ingin dicapai iaitu untuk memilih pemimpin yang terbaik. Dengan cara ini, insya-Allah, UMNO akan terus kuat, terus hebat lagi bersemangat.

Langkah keenam: Menjadi pengikut yang baik. Demikianlah juga halnya dengan orang yang dipimpin. Sekiranya kita memiliki pemimpin yang hebat seharusnya kita memiliki pengikut yang juga hebat.

Seperti dalam satu kisah selepas pembunuhan Saidina Uthman dan Saidina Ali dilantik menjadi khalifah keempat. Ketika ini bangkitlah pengikut Muawiyah, Amru al-As, Talhah dan Zubir al-Awam bersatu menentang perlantikan Saidina Ali. Keadaan umat Islam menjadi kucar-kacir dan bersengketa sesama sendiri.

Maka telah datanglah seorang sahabat menemui Saidina Ali. Sahabat itu bertanya kepada Saidina Ali; kenapakah sewaktu Rasulullah, Saidina Abu Bakar dan Saidina Umar memimpin dahulu, keadaan umat Islam kuat dan bersatu padu tetapi sewaktu engkau ya Ali menjadi pemimpin, keadaan umat Islam lemah dan berpecah belah?

Maka jawab Saidina Ali; sewaktu mereka menjadi pemimpin dahulu, orang seperti akulah yang menjadi pengikutnya. Tetapi apabila aku menjadi pemimpin, sayangnya orang seperti kamulah yang menjadi pengikutku.

Kisah ini menggambarkan isu pemimpin dan yang dipimpin tidak boleh dipandang remeh. Kita memerlukan bukan sahaja pemimpin yang berkualiti tetapi yang dipimpin juga perlu memiliki ciri-ciri umat yang unggul. Ini akan menjamin masyarakat lebih tertarik untuk ikut serta dalam perjuangan UMNO.

Langkah ketujuh: Membudayakan meritokrasi. Orang Melayu sudah seharusnya menerima konsep meritokrasi, menghayati dan mengamalkannya sebagai satu budaya untuk mengukur tahap kelayakan dan pencapaian dalam semua lapangan. Kita tidak akan benarkan orang lain menentukan corak dan rupa meritokrasi yang sedang dan akan dilaksanakan di negara ini. Bahkan meritokrasi akan bermula di kalangan masyarakat Melayu itu sendiri.

Ini bererti dalam semua bidang, orang Melayu harus diberi peluang mengikut kelayakan dan merit masing-masing. Pertimbangan haruslah diberikan kepada mereka yang menguasai ilmu, mempunyai kemampuan dan kemahiran, bukan semata mata berdasarkan kepada siapa yang kita kenal. Tentu sekali bukan kepada mereka yang menjual kontrak atau mereka yang berkemungkinan menggagalkan agenda Melayu. Dengan

mengamalkan meritokrasi sebegini, insya-Allah kita akan dapat membina daya tahan Melayu dan sekali gus menyelamatkan bangsa.

Sebenarnya, kita telah pun memulakan langkah meritokrasi ini dalam kepimpinan syarikat-syarikat milik kerajaan. Kerajaan amat komited untuk menyalurkan tenaga mahir untuk menyumbang kepada pembangunan bangsa dan negara.

Sebelum daripada ini lagi, telah ada Melayu yang cemerlang berdasarkan meritokrasi dan diiktiraf di peringkat dunia. Sekadar untuk kita maklumi dan turut rasa bangga bahawa pada hari ini orang Melayu telah berjaya mencapai peringkat tertinggi pengurusan syarikat Shell International di Belanda dan ada yang telah diiktiraf sebagai Gabenor Bank Pusat yang terbaik di Asia.

Begitulah juga dengan Petronas yang kini berusia 30 tahun, muncul sebagai salah satu daripada 500 syarikat gergasi di dunia. Petronas dipimpin oleh pengurusan Melayu, dianggotai tenaga profesional, tenaga mahir dan teknikal yang juga terdiri daripada orang Melayu.

Kita perlu mengambil iktibar daripada kejayaan Petronas mengubah sikap dan minda orang Melayu untuk menjadi lebih terbuka dan global. Pada awal tahun 90-an, orang Melayu banyak mempersoalkan apakah perlunya Petronas membelanjakan jumlah wang yang begitu besar untuk mengembangkan operasinya ke luar negara.

Pengurusan Petronas sendiri hangat membincangkan keperluan dan kemampuan mereka untuk menjadi syarikat multi-nasional. Hari ini rakyat Malaysia cukup berbangga dan kagum dengan Petronas yang berjaya mengembangkan sayapnya ke lebih 35 buah negara.

Lebih 40 peratus daripada pendapatan Petronas yang jumlahnya RM97 billion pada tahun lepas, datangnya daripada luar negara. Ternyata, jika kepimpinan Petronas tidak meyakinkan diri untuk mengambil langkah berani keluar dari Malaysia pada awal tahun 90-an, Petronas tidak mungkin mencapai prestasi yang begitu cemerlang pada hari ini.

Orang Melayu juga telah berjaya membuanakan pemikiran mereka. Kalau dahulu orang Melayu kurang berminat untuk bertugas di luar negara, yang sudah tentunya lebih mencabar, dan sebaliknya lebih selesa bekerja dan hidup

didampingi keluarga, sanak-saudara dan sahabat, pada hari ini orang Melayu sedar bahawa untuk benar-benar berjaya, mereka perlu memiliki pengalaman global yang datangnya daripada peluang bertugas di perantauan.

Pengalaman Petronas jelas membuktikan bahawa Melayu mampu menjadi lebih dari sekadar jaguh kampung. Jika kita gigih mencari ilmu, memiliki keyakinan diri yang tinggi, berani mencuba sesuatu yang baru, dan yang penting sekali, mampu keluar dari ruang selesa atau comfort zone masing-masing, insya-Allah kita akan berjaya.

Langkah kelapan: Membina masyarakat Islam Hadhari. Jika disingkap dari kisah-kisah anbiya sewaktu Nabi Allah Adam diperintahkan ke dunia, baginda telah dilengkapi dengan ilmu pengetahuan yang luas. Baginda diutus ke dunia sebagai khalifah yang telah bersih dari dosa untuk memakmurkan dunia serta menjadikannya sebagai bayangan kepada syurga, dan bukannya melakukan kerosakan di atas muka bumi.

Kisah ini membawa mesej yang sangat indah dan sangat menarik terhadap agama Islam dan tugas kita sebagai khalifah di muka bumi.

Konsep membentuk masyarakat Islam Hadhari adalah amat penting untuk membuktikan keindahan Islam itu. Konsep ini membawa pendekatan memajukan masyarakat berasaskan tuntutan akidah. Ertinya, sebagai manusia yang taat dan patuh kepada Allah s.w.t, kita dituntut mencapai kemajuan tinggi di bidang sains dan teknologi, tamadun kebendaan serta kekuatan ekonomi.

Kita sememangnya telah memulakan proses ini semenjak mencapai kemerdekaan. Dasar-dasar kerajaan, program dan aktiviti yang dilaksanakan, semuanya menjurus ke arah membentuk masyarakat Malaysia yang bertamadun.

Dalam usaha membina masyarakat Islam Hadhari untuk memartabatkan maruah bangsa dan agama, kita tidak seharusnya melihat Islam dengan pandangan yang sempit dan jumud. Islam bukanlah agama yang tertumpu kepada amalan ritual semata-mata.

Islam mencakupi semua aspek dan lapangan sebagai satu ajaran yang syumul (menyeluruh) dan kamil (lengkap).

Penggarapan kefahaman Islam yang betul amatlah mustahak dalam dunia yang serba mencabar ini. Kita lihat maruah umat Islam sering kali dihina, kerana kehidupan melarat, kelesuan dalam menghadapi cabaran dan ancaman, malah dilabelkan pula sebagai kumpulan pegganas. Sebaliknya, sebahagian negara-negara Islam lain yang diberikan kelebihan dan kekayaan hasil bumi, nikmatnya tidak pula

dapat dikongsi secara menyeluruh dan saksama dalam membantu mengurangkan penderitaan umat.

Bertolak dari konsep inilah, kita perlu memahami tugas dan tanggungjawab sebagai khalifah dan memegang amanah dalam membawa kebaikan, kesejahteraan dan kedamaian di muka bumi Allah ini.

Kesimpulannya, konsep masyarakat Islam Hadhari bertujuan untuk meningkatkan mutu kehidupan seharian, menyumbang kepada peradaban manusia, memupuk akhlak, memperteguhkan akidah, mengimarahkan ilmu, mempertegakkan keadilan, menyemai sikap toleransi dan menjadikan pembangunan yang kita kehendaki seimbang serta holistik demi kesejahteraan bangsa dan negara.

Untuk memastikan segala agenda terlaksana, maka Wanita, Pemuda dan Puteri harus peka terhadap peranan masing-masing dengan menghayati firman Allah dalam Surah-Surah Al-Muzzammil, Al-Mudathir dan As-Saff.

Ketiga-tiga surah ini jelas memberi perintah kepada Rasulullah dan kita semua, agar bangun dari tidur, lepaskan selimut dan membuat persiapan diri dengan melawan hawa nafsu, bersihkan pakaian, jauhi kejahatan dan mengatur strategi dalam satu barisan yang tersusun rapi untuk berjuang.

Hanya orang yang sentiasa bersiap sedia, gagah jasmaninya, kuat rohaninya dan berfikiran strategik sahaja, yang mampu untuk memikul tanggungjawab mengangkat maruah bangsanya dengan mengambil langkah-langkah yang tersusun dan terancang ke arah menjadi bangsa yang terbilang.

Kita yakin Wanita sebagai tulang belakang parti terus memperjuangkan kepentingan kaum ibu supaya tetap menjadi magnet dan tempat bergantung harap seluruh wanita di negara ini. Kita terus mengharapkan lahirnya lebih ramai pemimpin yang berkualiti dari kalangan Wanita.

Dalam konteks ini kita mengalu-alukan ketetapan kerajaan supaya 30 peratus daripada jawatan tertinggi dalam semua peringkat pembuat dasar dan keputusan sektor awam, akan diwakili oleh golongan Wanita dalam tempoh yang secepat mungkin.

Pemuda pula harus mengambil tanggungjawab sebagai agen

perubahan dan jurubicara umat. Pemuda mesti mencerminkan cita rasa generasi muda. Pemuda perlu sentiasa menzahirkan idealisme parti, iaitu idealisme yang bertunjangkan sikap yang pragmatik di samping memperjuangkan isu-isu yang menyentuh nurani dan aspirasi orang Melayu.

Kita percaya Pemuda akan terus menyahut seruan dan menjawab panggilan parti. Saya berharap proses peremajaan parti yang telah berlaku dengan penampilan 112 Ketua Pemuda Bahagian yang baru, akan menjadi pemangkin kepada perjuangan yang lebih dinamis.

Kita menghargai peranan Puteri yang telah berjaya menambah bilangan ahli UMNO di kalangan generasi muda. Usaha Puteri tanpa mengenal penat lelah yang telah berjaya memenangi hati dan perasaan rakyat melalui aktiviti-aktiviti pendidikan, kebajikan dan sosial haruslah diteruskan. Jadikanlah warna merah jambu itu sebagai warna pemikat hati rakyat.

Apabila melihat segala kejayaan demi kejayaan yang telah dilakukan, maka bangkitlah wahai Wanita, Pemuda dan Puteri. Teruskan perjuangan yang murni ini demi kejayaan bangsa yang berpanjangan sebagai bekalan dan survival generasi kita pada masa hadapan. Kita harus sentiasa ingat bahawa kita adalah parti teras dan tonggak dalam Barisan Nasional.

Secara sedar ataupun tidak, UMNO bukan sahaja dilihat sebagai komponen utama Barisan Nasional di Malaysia tetapi UMNO adalah satu-satunya part yang memegang rekod dunia sebagai parti paling lama memerintah secara berterusan. Ternyata di bawah UMNO, Allah telah memberikan kekuatan kepada kita untuk menerajui negara dengan aman, stabil, harmoni dan terus menuju kejayaan. Seperti yang telah disebutkan, proses peremajaan parti yang berlaku, telah memperkukuhkan lagi keyakinan kita terhadap masa depan parti yang lebih cemerlang di tangan generasi muda pada hari ini.

Alhamdulillah, jika beginilah kewibawaan dan dinamika kepimpinan generasi muda yang telah dipamerkan, maka kita dengan yakin dan berani mempertaruhkan nasib dan masa depan bangsa kepada saudara dan saudari semua.

Berbagai cabaran yang menanti, menuntut kita agar berubah. Namun sejarah menunjukkan bukanlah satu tugas yang mudah untuk mengubah sesuatu bangsa. Banyak onak dan duri yang

harus ditempuhi. Walaupun UMNO, parti tonggak bangsa Melayu kini berada pada kedudukan yang kuat, malah mungkin antara yang terkuat sejak ia ditubuhkan, namun itu tidak bermakna kita tidak perlu melakukan sebarang perubahan untuk menjamin kelangsungan bangsa kita.

Sedari awal ucapan saya, yang bertemakan Kesyukuran dan Perubahan, dapatlah kita simpulkan bahawa, untuk menjadi satu bangsa yang perkasa dan berjaya, kita harus berusaha untuk berada pada satu tahap yang lebih baik daripada bangsa-bangsa lain.

Inilah masa terbaik untuk kita memulakan usaha ke arah memastikan kesyukuran kepada kejayaan-kejayaan kita dengan melakukan perubahan. Intisaryanya: Memastikan kesyukuran untuk mengukuhkan ekonomi dan tahap pendidikan bangsa dengan perubahan terhadap komitmen kepada prinsip-prinsip meritokrasi dan juga kecemerlangan.

Memastikan kesyukuran dalam amalan nilai-nilai tradisional yang murni dengan membuat perubahan menerima pakai dan mengadunnya dengan nilai-nilai kontemporari.

Memastikan kesyukuran kuasa yang ada pada UMNO dengan membuat perubahan dalam kaedah memilih barisan pimpinan yang berdasarkan merit.

Yakinilah, UMNO kini semakin hari semakin kuat. Dengan kepimpinan Datuk Seri Abdullah Ahmad Badawi yang penuh berhemah; dengan mandat besar daripada rakyat dalam pilihan raya yang lalu; dengan terlaksananya dasar-dasar kerajaan yang mengutamakan masyarakat terbanyak; dengan perancangan masa depan yang jitu; ditambah dengan ketandusan isu daripada pembangkang; insya-Allah, tidak ada sesiapa pun, waima, mana-mana pihak dari luar atau dari dalam yang dapat menggugat perpaduan dan keutuhan parti yang tercinta ini.

Untuk mengakhiri ucapan saya pada malam ini, saya mengajak semua merenung sejenak pesanan pujangga yang penuh bermakna ini: Bila benci musuhmu dan sayang temanmu tidak lagi mempengaruhi tegakmu yang adil,

Bila engkau telah sanggup mengambil hikmat dari aliran zaman, mengambil manfaat dari perubahan, Maka semuanya dapat kau tawan, bukannya engkau yang ditawan.

Bila semuanya sanggup kau hadapi, Kesetiaanmu pada

perjuangan murni ini tidak berbelah bahagi, Maka engkaulah pahlawan pertiwi, engkaulah yang berhak mempusakai bumi dan seisi, Engkaulah sebenarnya Wanita, Pemuda dan Puteri bangsa sejati.

Di mulut ku lafazkan hasrat

Di hati ku bakar semangat Pada Wanita, Pemuda dan Puteri ku pohon tekad Pada Allah Yang Maha Esa ku pohon kudrat.

Dengan lafaz Bismillahirrahmanirrahim, saya dengan penuh rasa tawadhuk merasmikan Persidangan Perwakilan Wanita, Pemuda dan Puteri Tahun 2004 dengan ucapan selamat bersidang